

# 菩薩摩訶薩欲信持諸佛所說法 當學般若波羅蜜

智銘

佛言：「十方如恆河沙等世界中，諸佛所說法：已說、今說、當說，聞已，欲一切信持，自行亦爲人說，當學般若波羅蜜。」十方諸佛所說法，欲憶持不忘，當學般若波羅蜜，欲得信持利益，當學般若波羅蜜，欲自行亦爲人說，當學般若波羅蜜。

佛言：「菩薩摩訶薩，過去諸佛說已，未來諸佛當說，欲聞聞已，自利亦利他人，當學般若波羅蜜。」菩薩有三昧，名觀三世諸佛三昧，菩薩入是三昧中，悉見三世諸佛，聞其說法。復次，諸菩薩力不可思議，未來世雖未有形，未有言說，而能見、能聞。或以陀羅尼力，或以今事比之過去、未來諸事。以是故言，欲得是者，當學般若波羅蜜。

佛言：「十方如恆河沙等世界中，無有佛名、法名、僧名，欲使一切衆生，皆得正見。聞三寶音者，當學般若波羅蜜。」菩薩於先無佛法塔寺處，於中起塔，以是業因緣，後身得力成就。於無佛法象處，讚歎三寶，令衆生入於正見。如經說：有人於先無佛塔國土中，修立塔廟，得梵福德，梵名無量福德。以是因緣，疾得禪定，得禪定故，得無量神通，神通力故，能至十方讚歎三寶。正見者，若先不識三寶功德，因菩薩故得信三寶，信三寶故信業因緣罪福，信業因緣故，信世間是縛，涅槃是解。菩薩欲使衆生得正見，當學般若波羅蜜。

佛言：「菩薩摩訶薩，若欲令十方如恆河沙等世界中衆生，

諸在三惡趣者，以我力故皆得人身，當學般若波羅蜜。」三惡趣衆生得人身，不言以菩薩業因緣，但言菩薩恩力因緣故得。蓋菩薩以神通變化說法力故，令衆生修善得人身。如經中說二因緣，發起正見：一者、外聞正法；二者、內有正念。若無菩薩恩力因緣，衆生雖有業因緣，無由發起，以是故知諸佛菩薩，所益甚多。諸佛及大菩薩身，徧出無量光明，從是光明出無量化身，徧入十方三惡道中，令地獄火滅湯冷，其中衆生心清淨故，生天上人中；令餓鬼道饑渴飽滿，開發善心，得生天上人中；令畜生道隨意得食，離諸恐怖，開發善心，亦得生天上人中；如是名爲一切三惡道得解脫。

佛言：「菩薩摩訶薩，欲出家日即成阿耨多羅三藐三菩提，即是日轉法輪。轉法輪時，無量阿僧祇衆生遠離塵垢，諸法中得法眼淨，無量阿僧祇衆生，一切法不受故。諸漏心得解脫；無量阿僧祇衆生，於阿耨多羅三藐三菩提不退轉，當學般若波羅蜜。」或有菩薩，於惡世邪見衆生中，爲除衆生邪見故，自行勤苦甚難之行。如釋迦文佛於阿樓頻螺樹林中，食一麻一米，有菩薩謂佛爲實受是苦，是故發心：我當即以出家日成佛。又有菩薩於好世出家，如大通慧求佛道，結跏趺坐，經十小劫乃得成佛。菩薩聞是已，發心言：我以出家日即得成佛。有菩薩成佛已，不即轉法輪，如然燈佛。成佛已十二年，但放光明，人無識者而不說法

。又如須扇多佛，成佛已，無受化者，作化佛留住一切，說法度人，自身滅度。又如釋迦文佛成佛已，五十七日不說法。菩薩聞是已，即轉法輪。

有佛度眾生有限，如釋迦文佛轉法輪時，橋陳如一人得初道，八萬諸天諸法中得法眼淨。菩薩聞是已，作是願：我轉法輪時，令無量阿僧祇人，遠離塵垢，諸法中得法眼淨。以釋迦文佛初轉法輪時，一比丘及諸天，皆得初道，而無一人得漢羅及菩薩道者。是故，菩薩願言：我作佛時，當使無量阿僧祇眾生，一切法不受，諸漏心得解脫；及無量阿僧祇眾生，於阿耨多羅三藐三菩提不退轉。

佛言：「欲得壽命無量，光明具足，當學般若波羅蜜。」諸佛壽命有長有短，如鞞婆尸佛，壽八萬四千歲；如拘樓餐陀佛，壽六萬歲；迦那迦牟尼佛，壽三萬歲；迦葉佛，壽二萬歲；釋迦文佛，壽百歲，少有過者；彌勒佛，壽八萬四千歲。如釋迦文佛常光一丈；彌勒佛常光十里。

諸佛壽命、光明，各有二種：一者、隱藏；二者、顯現。一者、真實；二者、為眾生故隱。真實者，無量顯現；為眾生者，有限有量。實佛壽不應短，所以者何？諸佛長壽業因緣具足故。如婆伽梵，宿世救一聚落人命，故得無量阿僧祇壽命。梵世中壽法不過半劫；而此梵天壽獨無量，以是故，生邪見言：唯我常住。佛到其所，破其邪見，說其本緣救一聚落人，其壽乃爾。何況佛世世救無量阿僧祇眾生；或以財物救濟，或以身命代死，云何壽限不過百歲？又不殺生戒，是長壽因緣，佛以大慈眾生，愛徹骨髓，常能為眾生救死，何況殺生！又以諸法實相智慧，真實不誑故，亦是長壽因緣；菩薩以般若波羅蜜，和合持戒諸功德故，得壽命無量，何況佛世世具足此諸無量功德，而壽命有限？一切色中，佛身第一，一切心中，佛心第一，以是故，一切壽命中，佛壽亦應第一。諸佛壽命，實皆無量，為度人故，現有長、短。

佛言：「我成阿耨多羅三藐三菩提時，世界中無有淫欲、瞋恚、愚癡，亦無三毒之名。一切眾生，成就如是智慧；善施、善戒、善定。善梵行、善不燒眾生，當學般若波羅蜜。」貪欲、瞋

恚、愚癡，名為三不善根，是欲界繫法。佛若說貪欲、瞋恚、愚癡，是欲界繫不善；若說染愛、無明，是則通三界。有佛世界，純諸離欲人，如是眾生故，菩薩願言：我成佛時，國無三毒及三毒之名。復有清淨佛國，純阿鞞跋致，法性生身菩薩，無諸煩惱，唯有餘習，是故言無三毒之名。若有人言：如菩薩願言：我當度一切眾生，而眾生實不盡度；此亦如是，欲令世界無三毒之名，亦應實有三毒不盡。若無三毒，何用佛為？如經所說，若無三法，則佛不出世；若三法不斷，則不得離老、病、死。三法者，則是三毒。

有世界眾生分別諸法，是善、是不善，是縛、是解脫等，於一相寂滅中而生戲論；菩薩以是故願言：令我世界眾生，不生三毒，知三毒實相即是涅槃。

所謂成就一切眾生如是智慧者，是世間正見智慧。世間正見中，說有布施，有罪、有福、有今世、後世，有阿羅漢。信福、罪故，能善布施；信阿羅漢故，能善持戒，善禪定，善梵行，得正見力故，能善不燒眾生。世間正見，是無漏智慧根本；以是故，說國中無三毒之名。貪欲有二種：一者、邪貪欲；二者、貪欲。瞋恚有二種：一者、邪瞋恚；二者、瞋恚。愚癡有二種：一者、邪愚癡；二者、愚癡。是三種邪毒眾生，難可化度，餘三易度。無三毒名者，無邪三毒之名。欲使一切眾生，成就如是智慧，當學般若波羅蜜。

佛言：「使我般涅槃後，法無滅盡，亦無滅盡之名，當學般若波羅蜜。」所謂法無滅盡，是菩薩願，事不必實。一切有為法，從因緣和合生，云何常住而不滅？佛如日明，法如日沒餘光，云何日沒而餘光不滅？但久住故，無能見滅者，故名不滅。復次，菩薩見諸佛法住，有多、有少，如迦葉佛法住七日，如釋迦牟尼佛法住千歲。是故菩薩發是願言：法雖有為，願令相續不滅，如火得薪，相傳不絕。復次，諸法實相，名為佛法，是實法相，不生不滅，不斷不常，不一不異，不來不去，不受不動，不著不依，無所有如涅槃相，法相如是，云何有滅？諸法實相無有滅者。有人憶想分別，取諸法相，壞實法相，用二法說，是故有滅，

實相法中，無有滅也。復次，般若波羅蜜無礙法，集無量功德故，隨其本願，法法相續，無有見其滅者。

佛言：「我得阿耨多羅三藐三菩提時，十方如恆河沙等世界中衆生，聞我名者，必得阿耨多羅三藐三菩提。欲得如是等功德，當學般若波羅蜜。」有人生值佛世，在佛法中，或墮地獄者，如提婆達、俱伽梨、訶多釋子等，三不善法覆心，故墮地獄。此中云何言：去佛如恆河沙等世界，但聞佛名，便得道焉？蓋佛有二種：一者、法性身佛；二者、隨衆生優劣現化佛。爲法性身佛，故說乃至聞名得度；爲隨衆生現身佛，故說雖共佛住，隨業因緣有墮地獄者。

法性生身佛者，無事不濟，無願不滿。所以者何？於無量阿僧祇劫，積集一切善本功德，一切智慧無礙具足，爲衆聖主，諸天及大菩薩，希能見者。如人念觀世音菩薩，悉脫危難。是事尙爾，何況諸佛法性生身！如有見之者，聞其名者，必得阿耨多羅三藐三菩提。

釋迦文佛亦是法性生身分，佛住世時，之所以仍有作五逆罪人，饑餓盜賊，如是等惡者，蓋釋迦文佛本誓：我出惡世，欲以道法度脫衆生，不爲富貴世樂故出。若佛以力與之，則無事不能。又亦是衆生福德力薄，罪垢深重，故不得隨意度脫。又今佛但說清淨涅槃，而衆生譏論誹謗言：何以多畜弟子，化導人民，此亦是繫縛法；但以涅槃法化，猶尙譏謗，何況雜以世樂！如提婆達，欲令足下有千輻相輪故，以鐵作模，燒而烙之，烙已足壞，身惱大號。爾時，阿難聞已，涕泣白佛：我足欲死，願佛哀救，佛即伸手就摩其身，發至誠言：我看羅睺羅與提婆達等者，彼痛當滅，是時提婆達衆痛即除，執手觀之，知是佛手。便作是言：淨飯王子，以此醫術足自生活！佛告阿難：汝觀提婆達不？用心如是，云何可度！若好世人，則無是咎。如是衆生，若以世樂，不得度也。以是故說！聞佛名有得道者，有不得道者。

佛身無量阿僧祇，種種不同；有佛爲衆生說法，令得道者，有佛放無量光明，衆生遇之而得道者，有以神通變化，指示其心而得道者；有佛但現色身而得道者；有佛徧身毛孔出衆妙香，衆生聞之而得道者；有佛以食與衆生，令得道者；有佛，衆生但念

而得道者；有佛能以一切草木之聲而作佛事，令衆生得道者；有佛，衆生聞名而得道者。爲是佛故，說言：我作佛時，其聞名者，皆令得度。聞名，不但以名便得道也，聞已修道，然後得度。如須達長者初聞佛名，內心驚喜，詣佛聽法而能得道。是但聞名，聞名爲得道因緣，非得道也。

聞佛名而得道者，是謂即時得道，不言一心中。譬如經中說：修慈心時，即修七覺意。難者言：慈三昧有漏，是緣衆生法，云何即時修七覺？答者言：從慈起已，即修七覺，更無餘法，故言即時。即時有二種：一者、同時；二者、雖久更無異法，即是心而得修七覺，亦名即時。復次，有衆生福德純熟，結使心薄，應當得道；若聞佛名，即時得道。又復以佛威力故，聞即得度；爲是人故說：若聞佛名，即時得道。

般若波羅蜜經者，是佛欲解說其事，是故，品品中皆讚般若波羅蜜。復次，般若波羅蜜，是諸佛母，父母之中，母功最重；是故，佛以般若爲母，般舟三昧爲父。三昧能攝持亂心，令智慧得成，而不能觀諸法實相；般若波羅蜜，能徧觀諸法分別實相，無事不達，無事不成，功德大故，名之爲母。以是故，行者雖行六波羅蜜，及種種功德和合，能具衆願，而但說當學般若波羅蜜。復次，如般若後品中說：若無般若波羅蜜，餘五事不名波羅蜜。雖善修衆行，亦不能滿具諸願。衆生從無始世界中來，雖修布施、持戒、忍辱、精進、一心、智慧，受世間果報已而復還盡。所以者何？離般若波羅蜜故。今以佛恩，以般若波羅蜜修行六事，故得般若波羅蜜，成就佛道，使佛佛相續而無窮盡。

菩薩行般若波羅蜜時，普觀諸法皆空，空亦復空，滅諸觀，得無礙般若波羅蜜。以大悲方便力，還起諸功德業，此清淨業因緣故，無願不得。餘功德離般若波羅蜜，無有無礙智慧，云何言欲得諸願，當學檀波羅蜜等！復次，又以五波羅蜜離般若，不得波羅蜜名字，五波羅蜜如盲，般若波羅蜜如眼，五波羅蜜如壞瓶盛水，般若波羅蜜如成熟瓶，五波羅蜜如鳥無兩翼，般若波羅蜜如有翼之鳥。如是等種種因緣故，般若波羅蜜能成大事，以是故言：欲得諸功德及願，當學般若波羅蜜。

(完)